



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

DREJTORIA E PËRGJITHSHME PËR TË DREJTËN E INFORMIMIT
DREJTORIA PËR TË DHËNAT E HAPURA DHE KONSULTIMIN PUBLIK

Nr. 1987/1 prot.

Tiranë, më 22.07.2026

REKOMANDIM

Nr. 47, datë 22.07.2026

**MBI ZBATIMIN E LIGJIT NR. 33/2022 “PËR TË DHËNAT E HAPURA DHE
RIPËRDORIMIN E INFORMACIONIT TË SEKTORIT PUBLIK”
NGA AGJENCIA KOMBËTARE E BURIMEVE NATYRORE**

Në mbështetje të nenit 19 të ligjit nr. 33/2022 “Për të dhënat e hapura dhe ripërdorimin e informacionit të sektorit publik”,

KONSTATOVA SE:

Zyra e Komisionerit për të Drejtën e Informimit dhe Mbrojtjen e të Dhënave Personale (në vijim “Zyra e Komisionerit”) është institucioni përgjegjës për mbrojtjen, mbikëqyrjen dhe promovimin e së drejtës për ripërdorim të dokumenteve të organeve të sektorit publik, referuar nenit 19, pika 1 e ligjit nr. 33/2022 “Për të dhënat e hapura dhe ripërdorimin e informacionit të sektorit publik” (në vijim “Ligji nr. 33/2022”).

Në zbatim të “Planit të monitorimit të zbatimit të ligjit nr. 33, datë 31.03.2022 “Për të dhënat e hapura dhe ripërdorimin e informacionit të sektorit publik” nga organet e sektorit publik”, për vitin 2026, publikuar në faqen zyrtare të Zyrës së Komisionerit, si dhe Urdhrit nr. 53, datë 11.03.2026 “Për miratimin e “Manualit të monitorimit online dhe metodologjia e vlerësimit të publikimit të të dhënave të hapura nga organet e sektorit publik dhe sipërmarrjet publike””, u krye procesi i monitorimit, me objekt:

- ❖ Monitorim online i faqes zyrtare të Agjencisë Kombëtare të Burimeve Natyrore, në link-un <https://akbn.gov.al/>, lidhur me përmbushjen e detyrimeve që burojnë nga ligji nr. 33/2022 “Për të dhënat e hapura dhe ripërdorimin e informacionit të sektorit publik” e aktet nënligjore në zbatim të tij.

Komisioneri, pasi shqyrtoi relacionin e monitorimit online nga struktura përgjegjëse dhe provat e administruara gjatë këtij procesi monitorimi, vëren se:

- Ligji nr. 33/2022, në nenin 3 “Fusha e zbatimit”, shkronja “a”, përcakton se: “Ky ligj zbatohet për ripërdorimin e: a) dokumenteve ekzistuese që mbahen nga organet e sektorit publik;”

Në pikën 9 të nenit 6 të ligjit nr. 33/2022 përcaktohet se: “Organet e sektorit publik” përfshin çdo organ të pushtetit qendror, i cili kryen funksione administrative; çdo organ të enteve publike, në masën që ato kryejnë funksione administrative; çdo organ të pushtetit vendor që kryen funksione administrative; çdo organ të Forcave të Armatosura, për atë kohë sa kryejnë funksione administrative, si dhe çdo person fizik ose juridik, të cilit i është dhënë me ligj, akt nënligjor ose çdo formë tjetër, të parashikuar nga legjislacioni në fuqi, e drejta e ushtrimit të funksioneve administrative publike.”

Për sa më sipër, në kuptim të ligjit nr. 33/2022, Agjencia Kombëtare e Burimeve Natyrore konsiderohet Organ i Sektorit Publik dhe duhet të zbatojë detyrimet ligjore sipas dispozitave të mëposhtme të këtij ligji:

- Sipas nenit 6, pika 15: “Të dhëna të hapura” është format i pavarur nga platforma, i vënë në dispozicion të publikut pa asnjë kufizim që pengon ripërdorimin e dokumenteve.”
- Sipas nenit 7, pika 3: “Organi i sektorit publik përcakton listën e dokumenteve ekzistuese që mund të ofrohen në formatin e të dhënave të hapura, të cilën e bën publike.”
- Sipas nenit 9, pika 4” “Organet e sektorit publik dhe sipërmarrjet publike, për atë sa është e mundur teknikisht, i bëjnë të disponueshme të dhënat për ripërdorim menjëherë pas mbledhjes, përmes ndërfaqeve të përshtatshme API, në formë dinamike ose kur është e përshtatshme, si një shkarkim i vetëm voluminoz (bulk download).”
- Sipas nenit 10, pikat 1, 2 dhe 5:
 - “1. Ripërdorimi i dokumenteve, si rregull, ofrohet pa pagesë.
 - 2. Ripërdorimi i dokumenteve mund të bëhet kundrejt një tarife për të mbuluar kostot shtesë për arsye të riprodhimit, ofrimit e shpërndarjes së dokumenteve, për anonimizimin e të dhënave personale, si dhe për masat e marra për të mbrojtur informacionin sekret tregtar.
 - 5. Për çdo rast ku aplikohet tarifa, metodologjia, masa dhe përdorimi i tarifës duhet të përcaktohen me vendim të Këshillit të Ministrave. Organi i sektorit publik që aplikon tarifa për të drejtën e ripërdorimit e bën atë publike në faqen e vet të internetit, si dhe në portalin unik qeveritar të të dhënave të hapura.”
- Sipas nenit 11, pika 2: “Ripërdorimi i dokumenteve është i hapur ose kundrejt aplikimit të licencës standarde. Në rastin e aplikimit të licencës standarde, licenca ofrohet në formatin elektronik sipas modelit të miratuar me udhëzim të përbashkët të ministrit përgjegjës dhe Komisionerit për të Drejtën e Informimit dhe Mbrojtjen e të Dhënave Personale.”

- Sipas nenit 12, pika 1: *“Me qëllim lehtësimin e kërimit të të dhënave të hapura të ofruara nga organet e sektorit publik, krijohet/funksionon portali i të dhënave të hapura qeveritare. Ky portal krijohet dhe administrohet nga AKSHI.”*

Në interpretim të këtij neni, organet e sektorit publik duhet të mundësojnë ndërveprimin me portalin e të dhënave të hapura qeveritare opendata.gov.al.

- Sipas nenit 16, pika 1: *“Në grupin e të dhënave me vlerë të madhe përfshihen të dhëna në fushat:*
b) mjedisore dhe të vëzhgimit të tokës;
.....”

- Sipas nenit 17, pikat 1 dhe 2:

1. *“Për çdo kategori të të dhënave me vlerë të madhe për ekonominë dhe shoqërinë nga organi/et publike përgjegjëse, në koordinim me Komisionerin për të Drejtën e Informimit dhe Mbrojtjen e të Dhënave Personale, përcaktohen grupet specifike të këtyre të dhënave.*
2. *Grupet specifike të të dhënave me vlerë të madhe duhet të jenë:*
 - a) të disponueshme pa pagesë;*
 - b) të lexueshme nga kompjuteri;*
 - c) të ofruara përmes API-ve; dhe*
 - ç) kur është me rëndësi, të ofruara si një shkarkim i vetëm.”*

- Udhëzimi i përbashkët i ministrit të Ekonomisë, Kulturës dhe Inovacionit dhe i Komisionierit për të Drejtën e Informimit dhe Mbrojtjen e të Dhënave Personale nr. 2, datë 6.2.2025 *“Për miratimin e licencës standarde të ripërdorimit të informacionit të sektorit publik”*, përcakton këto detyrime kryesore për organet e sektorit publik:

- ✓ Sipas Kreut II, Fusha e Zbatimit, shkronja “a”: *“Ky udhëzim zbatohet nga organet e sektorit publik, për ripërdorimin e dokumenteve ekzistuese që mbahen prej tyre, në kuadër të detyrës publike.”*
- ✓ Sipas Kreut III, pika 2: *“Licenca do të jetë në format elektronik dhe do të shoqërojë informacionin që do të publikohet nga organet e sektorit publik dhe sipërmarrjet publike në faqet e tyre zyrtare dhe në portalin opendata.gov.al.”*
- ✓ Sipas pikës 5: *“Organet e sektorit publik dhe sipërmarrjet publike do të bashkëpunojnë me Agjencinë Kombëtare të Shoqërisë së Informacionit lidhur me implementimin e licencave në formatin elektronik, për dokumentet në formatin e të dhënave të hapura, në faqet e tyre zyrtare dhe në portalin opendata.gov.al, ripërdorimi i të cilave kërkon aplikimin e licencës standarde.”*
- ✓ Sipas Kreut V, pika 2: *“Ky udhëzim zbatohet nga organet e sektorit publik, sipërmarrjet publike në Republikën e Shqipërisë dhe Agjencia Kombëtare e Shoqërisë së Informacionit.”*

Në përmbushje të këtyre përcaktimeve ligjore vlerësohet se Agjencia Kombëtare e Burimeve Natyrore luan një rol të rëndësishëm në krijimin dhe publikimin e të dhënave në fushën e mjedisit, e cila është një kategori të rëndësishme e të dhënave me vlerë të madhe, referuar neneve 16 dhe 17 të ligjit nr. 33/2022.

Agjencia Kombëtare e Burimeve Natyrore është institucion në varësi të Ministrit të Infrastrukturës dhe Energjisë, krijuar me VKM nr. 547, datë 9.8.2006 “Për krijimin e Agjencisë Kombëtare të Burimeve Natyrore”, të ndryshuar, dhe veprimtaria e saj bazohet në ligje e akte të tjera nënligjore të cilat lidhen me sektorin minerar, hidrokarburet dhe energjetikën. Agjencia Kombëtare e Burimeve Natyrore (në vijim “AKBN”) referuar ligjeve specifike që rregullojnë këto fusha, duhet të mbledhë, përpunojë dhe publikojë të dhëna.

Referuar akteve ligjore e nënligjore që rregullojnë veprimtarinë e këtij organi të sektorit publik, si dhe referuar ligjit nr. 33, datë 31.03.2022 “Për të dhënat e hapura dhe ripërdorimin e informacionit të sektorit publik”, janë evidentuar dokumentet ekzistuese/të dhënat, që ky institucion duhet të publikojë në faqen zyrtare si të dhëna të hapura.

AKBN-ja ka detyrimin ligjor për publikimin e dokumenteve dhe të dhënave publike që mban dhe prodhon referuar akteve ligjore e nënligjore që rregullojnë veprimtarinë e këtij institucioni, në format të hapur (*open data*), të lexueshëm nga kompjuteri, të aksesueshëm dhe të ripërdorshëm, së bashku me *metadata*-n, sipas përcaktimeve të ligjit nr. 33/2022.

Në kuadër të zbatimit të detyrimeve ligjore të mësipërme dhe detyrimeve të ligjit nr. 33/2022, Zyra e Komisionerit ka kryer monitorimin online të faqes zyrtare të Agjencisë Kombëtare e Burimeve Natyrore, konkretisht rubrikave dhe përmbajtjes së tyre bazuar në dimensionet e vlerësimit të këtij procesi të monitorimit online, referuar “*Manualit të monitorimit online dhe metodologjia e vlerësimit të publikimit të të dhënave të hapura nga organet e sektorit publik dhe sipërmarrjet publike*”.

Nga monitorimi i faqes zyrtare të AKBN-së, në *link*-un: <https://akbn.gov.al/>, për përmbushjen e detyrimeve që burojnë nga ligji nr. 33/2022, rezulton se:

1. Agjencia ka krijuar një rubrikë të dedikuar “Të dhënat e Hapura” në faqen e saj zyrtare, si nënmenu në Programin e Transparencës dhe ka publikuar në të dy nënmenu: “Raportime” dhe “Statistika”, ku gjendet lista e dokumenteve që mban e prodhon, të cilat duhet të ofrohen në format të hapur sikurse kërkohet nga neni 7, i ligjit nr.33/2022.
2. Në faqe në menunë kryesore ekzistojnë edhe rubrika të tjera të cilat kanë të listuara në mënyrë të shpërndarë dokumente të ndryshme, që duhet të publikohen si të dhëna të hapura, referuar fushës së saj të përgjegjësisë.
3. Nga verifikimi i përmbajtjes së këtyre rubrikave konstatohet se ato përmbajnë informacion/ dokumente/të dhëna që mbledh/përpunon/krijon/prodhon ky organ i sektorit publik referuar detyrimeve ligjore sipas fushës së saj të përgjegjësisë. Nëse klikojmë mbi emërtesën e çdo dokumenti të listuar në këto rubrika

kostatohet se ato ofrojnë informacion të publikuar të fragmentizuar e të papërditësuar.

4. Përsa i përket formatit të dokumenteve, rezulton se jo gjithmonë janë në formate të hapura, të lexueshme nga kompjuteri, referuar detyrimeve ligjore që duhet të përmbushë kjo agjenci.

Lidhur me konstatimet e mësipërme, bazuar në kërkesat e ligjit nr. 33/2022, më poshtë paraqitet situata konkrete pas verifikimit të përmbajtjes së rubrikave të publikuara në faqen zyrtare të AKBN-së.

- ❖ Rubrika “Të dhëna të hapura” në menunë kryesore “Programi i Transparencës”, në nënmenunë “Raportime”, gjejmë të publikuara:
 - AKBN 30% më shumë monitorime të HEC-eve dhe Paneleve Fotovoltaike gjatë periudhës Janar – Shtator 2024, përmban informacion narrativ dhe imazhe.
 - Situata në Sektorin Hidroenergjitik, nuk ka informacion në brendësi.
 - Kontratat aktive të HEC-eve, nuk ka informacion në brendësi
 - Regjistri i lejeve minerare aktive Shkurt 2023, nuk ka informacion në brendësi.
 - Treguesit vjetor sipas vetëdeklarimeve në Rev-Zone për vitin 2020, në përmbajtje ka raport me të dhëna tabelare, në formatin pdf.
 - Tabela e përgjithshme e prodhimit të mineraleve metalore, jometalore dhe materialeve të ndërtimit, tabelë në formatin pdf.
 - Regjistri i liçencave aktive për shoqëritë konçesionare të HEC-eve, nuk ka informacion në brendësi.
 - Prodhimi i naftës dhe gazit në Shqipëri për vitin 2019, përmban dokumente me të dhëna tabelare të ruajtuara dhe të publikuara në formatin pdf.
 - Prodhimi i mineralit të kromit i realizuar për vitet 2015-2017 në Bulqizë, përmban dokument me të dhëna tabelare të ruajtuara dhe të publikuara në formatin pdf.
 - Progres Raporti i Burimeve të Rinovueshme, përmban dokumente të ruajtuara dhe të publikuara në formatin pdf.
 - “Prodhim – Tregtim – Shpërndarje e Naftës në Shqipëri (naftë bruto)” për vitin 2015, nuk ka informacion në brendësi.
- ✓ Në nënmenunë “Statistika”, gjejmë të publikuara:
 - Tabela e përgjithshme e prodhimit të mineraleve metalore, jometalore dhe materialeve të ndërtimit. Ky dokument ka në përmbajtje një dokument në formë tabelare, i ruajtur dhe publikuar në foramin pdf.

Të gjitha dokumentet e mësipërme, nuk janë në format të hapur dhe janë të papërdirësuar sipas viteve duke mos përmbushur kështu kërkesat e nenit 9 të ligjit nr.33/2022.

- ❖ Në menunë kryesore “Shërbime”, në nënmenunë “Analiza fiziko-kimike të mineraleve”, janë publikuar të dhëna për Shërbimet e ofruara nga laboratorit fiziko-kimik në AKBN, në formë tabelare, të pa shkarkueshme e jo në format të hapur.

- ✓ Nënmenuja “Monitorimi i HEC-eve”, ka në përmbajtje informacion në lidhje me monitorimin e HEC-eve, dokumentacionin dhe hapat e procedurës por nuk ka të dhëna statistikore për monitorimin e kryer që të shërbejnë si të dhëna të hapura.
- ❖ Nënmenutë “Raportimet Online” dhe “GIS”, nuk funksionojnë duke mos ofruar asnjë informacion/të dhëna e nuk të drejtojnë në faqen e duhur.
- ❖ Në menunë kryesore “Informacion”, në nënmenunë “Raporte të AKBN-së” janë nënrubrikat e mëposhtme ku gjejmë të publikuara të dhëna shkencore sipas Drejtorive, të cilat janë të paplota, të papërditësuara e jo në format të hapur.
 - Raporte Drejtoria Hidrokarbure
 - Raporte Drejtoria Minerare
 - Raporte Drejtoria e Monitorimit të HEC-eve
 - Raporte Drejtoria e Energjive të Rinovueshme.
- ❖ Në menunë kryesore “Projekte”, në nënmenunë “Të dhëna shkencore”, në rubrikën e parë “Drejtoria e Monitorimit të Hidrocentraleve”, është i publikuar Informacion mbi HEC-in “Paulin” dhe “Paulin 1”, në formatin tekst së bashku me vlerat numerike, dhe në rubrikën e dytë “Të dhëna shkencore të tjera”, gjejmë:
 - Situata në Sektorin Hidroenergjitik, nuk ka informacion/dokumentacion në përmbajtje.
 - Regjistri i licencave aktive për shoqëritë konçesionare të HEC-eve, nuk ka informacion/dokumentacion në përmbajtje.
 - Situata hidroenergjitike, ka të dhëna në format tekst dhe shifra.
 - Kalendari i oponencës teknike, ka të publikuar vetëm tek “LISTA E PROJEKTEVE TË ZBATIMIT NË PROCES”, të dhëna tabelare të ruajtur dhe të publikuara në formatin xlsx. Në filet: “LISTA E PROJEKTEVE TË ZBATIMIT TË MIRATUARA NGA OT”, “LISTA E PROJEKTEVE TË ZBATIMIT TË REJA”, “LISTA E STUDIMIT TË FISIBILITETIT NË PROCES”, “LISTA E STUDIMIT TË FISIBILITETIT TË MIRATUARA NGA OT” dhe “LISTA E STUDIMIT TË FISIBILITETIT TË REJA”, nuk gjenden materiale të publikuara.
- ❖ Në menunë kryesore Programin e Transparencës, në rubrikën:
 - ✓ Informacion mbi buxhetin dhe të dhënat financiare të AKBN, janë të listuara dokumentet si më poshtë të cilat janë të paplota, të papërditësuara e jo në format të hapur:
 - Buxheti, plani i shpenzimeve për vitin financiar në vijim dhe vitet e kaluara, përmban të dhëna për buxhetin e vitit 2022 dhe realizimin e buxhetit për vitin 2023.
 - Raport vjetor për zbatimin e buxhetit dhe anekset, nuk ka lidhje të faqes, nuk ka dokumentacion/të dhëna.
 - Dokumente që tregojnë gjendjen e shlyerjes së detyrimeve nga subjektet e licencuara, nuk ka lidhje të faqes, nuk ka dokumentacion/të dhëna.

- ✓ Informacion për procedurat e prokurimit/procedurat konkurruese të koncesionit/partneritetit publik privat:
 - Lista e kontratave të lidhura (përfshirë shumën e kontraktuar, palët kontraktuese dhe përshkrimin e shërbimeve), nuk ka lidhje të faqes, nuk ka dokumnetacion/të dhëna.
 - Regjistri i parashikimeve të prokurimit publik, ka të publikuar Regjistrat e parashikimeve të prokurimeve publike për vitet 2017 – 2025, në formatin pdf.
 - Regjistri i realizimeve të prokurimit publik, ka të publikuar Regjistrat e realizimeve të prokurimeve publike për vitet 2017 – 2025, në formatin pdf.
 - Informacion mbi zbatimin dhe monitorimin e kontratave, si dhe udhëzues e politika të ndryshme, nuk ka lidhje të faqes, nuk ka dokumnetacion/të dhëna.

Në menunë anësore në të majtë të faqes, gjenden gjithashtu të publikuara disa të dhëna të ndara sipas drejtorive dhe veprimtarisë në të cilën ushtron detyrat AKBN-ja, të cilat janë të paplota, të papërditësuara e jo në format të hapur:

- ❖ Energjitë e Rinovueshme,:
 - ✓ Progres Raporti i Burimeve të Rinovueshme 2016-2017 dhe 2017-2018, ka në përmbajtje raporte me të dhëna edhe në shifra të cilat janë ruajtur dhe publikuar në formatin pdf.
 - ✓ Bilanci Energjistik, ka në përmbajtje raporte me të dhëna edhe në shifra të cilat janë ruajtur dhe publikuar në formatin pdf.
 - ✓ Energjia – Gjeotermale, ka në përmbajtje raporte me të dhëna në shifra dhe në harta, të cilat janë ruajtur dhe publikuar në formatin pdf.
 - ✓ Energjia Diellore, ka në përmbajtje vetëm një tekst, dhe një webpage që nuk *link*-ohet.
 - ✓ Energjia e erës, ka në përmbajtje raport me të dhëna në shifra, grafik dhe harta, të cilat janë ruajtur dhe publikuar në formatin pdf.
- ❖ Hidrokarburet:
 - ✓ Harta e Blloqeve të Kërkimit, ka në përmbajtje një hartë në formatin pdf.
 - ✓ Situata aktuale e licencimit, ka në përmbajtje vetëm tekst.
 - ✓ Informacion për gjëndjen aktuale të marrëveshjeve hidrokarbure, ka në përmbajtje vetëm tekst me shifra.
- ❖ Minierat:
 - ✓ Regjistri i lejeve minerare aktive Shkurt 2023, nuk ka asgjë në përmbajtje.
 - ✓ Treguesit vjetor sipas vetëdeklarimeve në Rev-Zone për vitin 2020, ka në përmbajtje raport me tekst dhe të dhëna tabelare i ruajtur dhe publikuar në pdf.
 - ✓ Regjistri i lejeve minerare aktive, tabelë në formatin pdf.
 - ✓ Harta Dixhitale, sisitemi ARCGIS, kërkon aksesim me log in e nuk mund të vlerësojmë përmbajtjen e saj.
 - ✓ Laboratori Minerar i Pasurimit, formati tekst dhe shifra, i pa strukturuar me të dhënat në përmbajtje.
- ❖ Hidroenergjitika, nuk ka informacione/dokumentacion në përmbajtje.

Gjithashtu referuar legjislacionit shqiptar, ligjit nr.72/2012 “Për Organizimin dhe Funksionimin e Infrastrukturës Kombëtare të Informacionit Gjeohapësinor në Republikën e Shqipërisë”, i ndryshuar, për publikimin e të dhënave të mbledhura apo krijuara nga AKBN, referuar fushës së veprimtarisë e përgjegjësisë, është monitoruar edhe faqja zyrtare <https://geoportal.asig.gov.al/> e cila administrohet nga Autoriteti Shtetëror për Informacionin Gjeohapësinor (neni 11, 24, etj).

Referuar websitit: <https://geoportal.asig.gov.al/>, ku publikohen të dhëna gjeohapësinore rezultojnë se Agjencia Kombëtare e Burimeve Natyrore, është identifikuar si Autoriteti Përgjegjës për Temën: “Burimet minerare” me Vendimin nr. 2 datë 5.04.2017 dhe “Burimet energjetike” me Vendimin nr. 18 datë 19.07.2017, për të cilat në Gjeoportalin Kombëtar gjejmë të publikuara të dhënat si më poshtë:

- ❖ Në rubrikën Harta/Tema: “Burimet minerare”, publikuar në *link-un*:
<https://geoportal.asig.gov.al/geonetwork/srv/alb/catalog.search#/metadata/3193e33c-8e81-4dfe-8d48-850bd0d88e0c>; janë publikuar:
 - Burimet Minerare, Zonat e planifikuara sipas VKM 347 – Metadata, në *link-un*:
<https://geoportal.asig.gov.al/geonetwork/srv/alb/catalog.search#/metadata/d4f8be7b-f002-41fc-a7d9-6510086d30cb>;
 - Burimet Minerare, Zonat e rrezikshme minerare VKM 347– Metadata, në *link-un*:
<https://geoportal.asig.gov.al/geonetwork/srv/alb/catalog.search#/metadata/4a2a71f1-57a5-484d-a4ed-d9595b494263>;
 - Burimet Minerare, Zonat e rrezikshme minerare VKM 726 – Metadata, në *link-un*:
<https://geoportal.asig.gov.al/geonetwork/srv/alb/catalog.search#/metadata/33f8037b-12b6-4a78-85b0-faeef8c668b1>;
 - Burimet Minerare, Zonat e minierave të vjetra – Metadata, në *link-un*:
<https://geoportal.asig.gov.al/geonetwork/srv/alb/catalog.search#/metadata/637f72ff-48db-4229-8f19-fa34b00f9f3c>;
 - Burimet Minerare, Lejet Minerare të Shfytëzimit – Metadata, në *link-un*:
<https://geoportal.asig.gov.al/geonetwork/srv/alb/catalog.search#/metadata/3193e33c-8e81-4dfe-8d48-850bd0d88e0c>;
- ❖ Në rubrikën Harta/Tema: “Burimet energjetike”, gjendet e publikuar në *link-un*:
<https://geoportal.asig.gov.al/map/?themeId=3308131&auto=true>, janë publikuar:
 - Monitorimi i HEC- eve, Nënvepër Hidrocentali – Metadata, në *link-un*:
<https://geoportal.asig.gov.al/geonetwork/srv/alb/catalog.search#/metadata/9446904d-8cf5-457c-9bc2-7e6bbf388af0>;
 - Monitorimi i HEC- eve, Lidhje e Nënveprave - Metadata, në *link-un*:
<https://geoportal.asig.gov.al/geonetwork/srv/alb/catalog.search#/metadata/6c563718-c095-483b-a6f2-7a7b6e989bb4>;

Publikimi i këtij informacioni, si më lart, është në format të hapur dhe i shoqëruar gjithashtu me *metada*-të, në përputhje me përcaktimet e ligjit nr.33/2022.

5. Në faqen e Agjencisë nuk gjendet e publikuar logoja e licencës që përcakton kushtet e ripërdorimit, referuar detyrimeve të “Udhëzimit të përbashkët nr.2, datë

6.2.2025 “Për miratimin e licencës standarde të ripërdorimit të informacionit të sektorit publik”.

6. Nga verifikimi në portalin opendata.gov.al, gjenden të dhëna apo dokumente të publikuara nga AKBN lidhur me veprimtarinë e saj, konkretisht:

AKBN ka publikuar dokumente/të dhëna në kategorinë mjedisi:

- ✓ Programi i zhvillimit të agjensisë kombëtare të burimeve natyrore, e krijuar në datën 29.01.2025 dhe e përditësuar së fundi në 19.05.2026. *Metadat*-at mund të shkarkohen në formate të hapura të ndryshme si RDG, Json, CSV etj., dhe është e shoqëruar me licencën CC BY.
- ✓ Përditësimi gjeohapësinor i të dhënave të lejeve minerare të shfrytëzimit, viti 2025, e krijuar në datën 29.01.2025 dhe e përditësuar së fundi në 19.05.2026. *Metadata*-t mund të shkarkohen në formate të hapura dhe është e shoqëruar me licencën CC BY-SA.
- ✓ Prodhimi i naftës dhe gazit 2007-2019, është krijuar në datën 11.02.2025 dhe është përditësuar në datën 11.02.2025. *Metadata*-t mund të shkarkohen në formate të hapura të ndryshme si RDG, Json, CSV etj., dhe janë të shoqëruara me licencën CC BY-SA.

Referuar këtij procesi monitorimi dhe vlerësimi, bazuar në dokumentin “*Metodologjia e vlerësimit të publikimit të të dhënave të hapura nga Organet e Sektorit Publik dhe Sipërmarrjet Publike*”, rezulton një nivel “Përputhshmërie e pjesshme” e këtij organi të sektorit publik , në zbatimin e ligjit nr. 33/2022.

Ligji nr. 33/2022 përcakton se të dhënat e hapura nuk kanë vetëm funksion informues, por synojnë në mënyrë të drejtpërdrejtë ripërdorimin e informacionit të sektorit publik për qëllime ekonomike, sociale, kërkimore, inovative dhe zhvillimore.

Në këtë kuptim, publikimi i të dhënave në formate të hapura dhe të lexueshme nga kompjuteri synon krijimin e mundësisë që këto të dhëna të analizohen, përpunohen, kombinohen dhe ripërdoren nga aktorë të ndryshëm publikë dhe jopublikë, në funksion të zhvillimit të politikave të bazuara në evidencë, rritjes së transparencës dhe nxitjes së inovacionit digjital.

Në mënyrë të veçantë, të dhënat mjedisore përbëjnë kategori të të dhënave me vlerë të madhe (*high-value datasets*), sipas nenit 16 të ligjit nr. 33/2022 dhe standardeve të Direktivës (BE) 2019/1024, për shkak të ndikimit të tyre të drejtpërdrejtë në mbrojtjen e mjedisit, shëndetin publik, kërkimin shkencor, monitorimin e ndotjes, menaxhimin e burimeve natyrore dhe zhvillimin e shërbimeve digjitale me interes publik.

Për rrjedhojë, mospublikimi i tyre në formate të hapura, të strukturuar dhe të ripërdorshme, në përputhje edhe me përcaktimet e nenit 17 të ligjit nr. 33/2022, kufizon ndjeshëm mundësinë e përdorimit efektiv të informacionit publik nga qytetarët, komuniteti akademik, organizatat e shoqërisë civile, media dhe sektori privat.

Sa më sipër, në zbatim të neneve 7, 9, 10, 11, 12, 17 dhe 19 të ligjit nr. 33/2022,

REKOMANDOJ:

1. Organi i sektorit publik/ Agjencia Kombëtare e Burimeve Natyrore, në rubrikën e krijuar dedikuar të dhënave të hapura, duhet të plotësohet lista e dokumenteve dhe të dhënave që prodhon AKBN-ja referuar veprimtarinë e saj, në zbatim të nenit 7, pika 3, të ligjit nr.33/2022 *“Për të dhënat e hapura dhe ripërdorimin e informacionit të sektorit publik”* dhe të përditësohen të dhënat. Në këtë listë të përfshihen edhe dokumentet/të dhënat e publikuara nga ASIG të cilat janë krijuar nga AKBN-ja dhe të bëhet lidhja me publikimin, si dhe të dhëna të tjera të cilat janë të shpërndara në rubrika të ndryshme të faqes së saj zyrtare.
2. Dokumentet në këtë listë të jenë në format të hapur/*open data*, të lexueshëm nga kompjuteri, të aksesueshëm dhe të ripërdorshëm, së bashku me *metadata*-n, në zbatim të neneve 9 dhe kushteve të nenit 17 të ligjit nr. 33/2022 *“Për të dhënat e hapura dhe ripërdorimin e informacionit të sektorit publik”*.
Gjithashtu, edhe dokumentet e publikuara në rubrikat e tjera, të cilat përmbajnë të dhëna mbi veprimtarinë e AKBN-së, të publikohen në format të hapur, të lexueshëm nga kompjuteri.
3. Të vendoset në këtë rubrikë logo e licencës CC BY 4.0 për kushtet e ripërdorimit, referuar Udhëzimit të përbashkët të ministrit të Ekonomisë, Kulturës dhe Inovacionit dhe Komisionierit për të Drejtën e Informimit dhe Mbrojtjen e të Dhënave Personale nr. 2, datë 6.2.2025 *“Për miratimin e licencës standarde të ripërdorimit të informacionit të sektorit publik”*, e në zbatim të nenit 11 të ligjit nr. 33/2022 *“Për të dhënat e hapura dhe ripërdorimin e informacionit të sektorit publik”*.
4. Dokumentet/të dhënat të publikohen edhe në portalin opendata.gov.al, me *metadata* dhe përditësim periodik, në zbatim të nenit 12 të ligjit nr. 33/2022 *“Për të dhënat e hapura dhe ripërdorimin e informacionit të sektorit publik”*.
Dokumentet/të dhënat e publikuara në portalin opendata.gov.al me *metadata*, duhet të përditësohen vazhdimisht referuar veprimtarisë së AKBN-së.
5. Në zbatim të nenit 18 dhe pikës 2 të nenit 19 të ligjit nr. 33/2022 *“Për të dhënat e hapura dhe ripërdorimin e informacionit të sektorit publik”*, detyrimet e përcaktuara në këtë Rekomandim të plotësohen brenda 90 ditëve nga data e marrjes dijeni.

Ky Rekomandim u shpall sot, më datë 22.07.2026.

KOMISIONERI

Besnik Dervishi